




Привремена заједничка комисија оба дома
Парламентарне скупштине БиХ за спровођење
процедуре за именовање три омбудсмена за
људска права Босне и Херцеговине

Privremena zajednička komisija oba doma
Parlamentarne skupštine BiH za provodenje
procedure za imenovanje tri ombudsmena
za ljudska prava Bosne i Hercegovine

Privremeno zajedničko povjerenstvo obaju
domova Parlamentarne skupštine BiH za
provođenje procedure imenovanja tri
ombudsmena za ljudska prava Bosne i
Hercegovine

Broj: 01,02-50-14-469-3,1/15
Sarajevo, 1.7.2015.



Organizaciona jedinica	Klasifikaciona oznaka	Redni broj	Broj priloga

Parlamentarna skupština Bosne i Hercegovine
Članovima Privremene zajedničke komisije oba doma
Parlamentarne skupštine BiH za provođenje procedure
za imenovanje tri ombudsmena za ljudska prava
Bosne i Hercegovine
O v d j e

PREDMET: Dostava Poslovnika Privremene zajedničke komisije

Poštovani,

U prilogu vam dostavljamo Poslovnik Privremene zajedničke komisije oba doma Parlamentarne skupštine BiH za provođenje procedure za imenovanje tri ombudsmena za ljudska prava Bosne i Hercegovine, usvojen na 3. sjednici Privremene zajedničke komisije, održanoj 1.7.2015.

S poštovanjem,

Prilog: kao u tekstu

Dostavljeno:

- naslovu
- Maji Gasal-Vražalici
- Sektoru za druga parlamentarna tijela
- a/a

Predsjedavajući Privremene zajedničke
komisije
Hanka Genjac

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE**

**ДОМ НАРОДА
ПРЕДСТАВНИЧКИ ДОМ**

**DOM NARODA
PREDSTAVNIČKI DOM / ZASTUPNIČKI DOM**

Привремена заједничка комисија оба дома
Парламентарне скупштине БиХ за спровођење
процедуре за именовање три омбудсмена за
људска права Босне и Херцеговине

Privremena zajednička komisija oba doma
Parlamentarne skupštine BiH za provođenje
procedure za imenovanje tri ombudsmena
za ljudska prava Bosne i Hercegovine

Privremeno zajedničko povjerenstvo obaju
domova Parlamentarne skupštine BiH za
provođenje procedure imenovanja tri
ombudsmana za ljudska prava Bosne i
Hercegovine

Broj: 01,02-50-14-469-3,1/15
Sarajevo, 1.7.2015.

POSLOVNIK

Privremene zajedničke komisije oba doma Parlamentarne skupštine BiH za provođenje procedure za imenovanje tri ombudsmana za ljudska prava Bosne i Hercegovine

Sarajevo, juli 2015. godine

Na osnovu čl. 8., 9., 10. i 11. Zakona o ombudsmenu za ljudska prava Bosne i Hercegovine („Službeni glasnik BiH“, br. 19/02, 35/04 i 32/06), Privremena zajednička komisija oba doma Parlamentarne skupštine BiH za provođenje procedure za imenovanje tri ombudsmena za ljudska prava Bosne i Hercegovine je na 3. sjednici, održanoj 1.7.2015. godine, usvojila

POSLOVNIK

Privremene zajedničke komisije oba doma Parlamentarne skupštine BiH za provođenje procedure za imenovanje tri ombudsmena za ljudska prava Bosne i Hercegovine

Član 1. (Predmet Poslovnika)

Ovim poslovníkom uređuju se: način rada Privremene zajedničke komisije oba doma Parlamentarne skupštine BiH za provođenje procedure za imenovanje tri ombudsmena za ljudska prava Bosne i Hercegovine (u daljnjem tekstu: Privremena zajednička komisija), raspisivanje i uslovi javnog konkursa, rad po okončanju javnog konkursa, javnost rada, kriteriji bodovanja, intervju-javno saslušanje, utvrđivanje rang-liste kandidata te prijelazne i završne odredbe.

Član 2. (Privremena zajednička komisija)

- (1) Članovi Privremene zajedničke komisije imenovani su na 9. sjednici Predstavničkog doma Parlamentarne skupštine Bosne i Hercegovine, održanoj 25. marta 2015., i na 3. sjednici Doma naroda Parlamentarne skupštine Bosne i Hercegovine, održanoj 30. marta 2015.
- (2) Privremena zajednička komisija ima zadatak da, u skladu sa Zakonom o ombudsmenu za ljudska prava Bosne i Hercegovine („Službeni glasnik BiH“, br. 19/02, 35/04 i 32/06), provede proceduru oglašavanja za imenovanje tri ombudsmena za ljudska prava Bosne i Hercegovine i domovima predloži kandidate za imenovanje tri ombudsmena za ljudska prava Bosne i Hercegovine (u daljnjem tekstu: ombudsmen za ljudska prava).

Član 3. (Zabrana diskriminacije)

Prilikom provođenja javnog konkursa i postupka utvrđivanja rang-liste kandidata za imenovanje ombudsmena za ljudska prava, Privremena zajednička komisija dužna je osigurati za sve kandidate jednake uslove za učešće na javnom konkursu, bez diskriminacije po bilo kojoj osnovi.

Član 4.
(Konstituirajuća sjednica Privremene zajedničke komisije)

- (1) Konstituirajuću sjednicu Privremene zajedničke komisije sazivaju sekretar Predstavničkog doma i sekretar Doma naroda.
- (2) Konstituirajućom sjednicom Privremene zajedničke komisije, do izbora predsjedavajućeg, predsjedava najstariji izabrani član Privremene zajedničke komisije.
- (3) Privremena zajednička komisija konstituira se izborom predsjedavajućeg, prvog i drugog zamjenika predsjedavajućeg iz tri konstitutivna naroda.
- (4) Predsjedavajući i prvi zamjenik predsjedavajućeg ne mogu biti članovi istog doma.

Član 5.
(Način rada Privremene zajedničke komisije)

- (1) Predsjedavajući Privremene zajedničke komisije:
 - 1) saziva sjednice;
 - 2) predlaže dnevni red;
 - 3) koordinira rad;
 - 4) predstavlja Privremenu zajedničku komisiju;
 - 5) potpisuje Poslovnik Privremene zajedničke komisije, zaključke i druge akte koje Privremena zajednička komisija donosi.
- (2) Predsjedavajući saziva sjednicu Privremene zajedničke komisije pet dana prije njenog održavanja, osim ako ne postoje opravdani razlozi da se ona sazove u kraćem roku. Članovima Privremene zajedničke komisije i onima koji se pozivaju na sjednice na vrijeme se dostavljaju materijali koji su u vezi s dnevnim redom sjednice. Materijali koji su u vezi s dnevnim redom sjednice objavljuju se na veb-stranici Parlamentarne skupštine BiH.
- (3) Prvi zamjenik predsjedavajućeg Privremene zajedničke komisije zamjenjuje predsjedavajućeg Privremene zajedničke komisije kada je ovaj spriječen da obavlja dužnost predsjedavajućeg. Ako je prvi zamjenik predsjedavajućeg odsutan, dužnost predsjedavajućeg obavlja drugi zamjenik predsjedavajućeg.
- (4) Sve stručne i administrativno-tehničke poslove za potrebe Privremene zajedničke komisije obavlja sekretar.

Član 6.
(Kvorum i odlučivanje)

- (1) Za održavanje sjednica Privremene zajedničke komisije potreban je kvorum, koji čine četiri člana, uz uslov da sjednici prisustvuje najmanje po jedan predstavnik svakog konstitutivnog naroda i po jedan član iz svakog doma.

- (2) Privremena zajednička komisija odlučuje prostom većinom glasova članova koji su prisutni i koji glasaju, uz uslov da ta većina obuhvata najmanje po jednog člana iz svakog doma i po jednog predstavnika svakog konstitutivnog naroda.

Član 7.
(Konsultacije)

Privremena zajednička komisija će tokom rada obaviti konsultacije s međunarodnim organizacijama i organizacijama civilnog društva koje se bave pitanjima zaštite i promocije ljudskih prava i građanskih sloboda, a koje iskažu interes za tim. Po potrebi, Privremena zajednička komisija zatražit će i pomoć stručnih, naučnih i javnih radnika.

Član 8.
(Javnost rada)

- (1) Sjednice Privremene zajedničke komisije otvorene su za javnost, osim kada se odluči suprotno.
- (2) Kada to odluči Privremena zajednička komisija, njene sjednice snimaju se tonski.
- (3) Privremena zajednička komisija će na svoje sjednice pozivati sljedeće međunarodne organizacije:
- 1) OSCE;
 - 2) OHR;
 - 3) Ured Vijeća Evrope BiH;
 - 4) Delegaciju Evropske unije u BiH;
 - 5) Ured rezidentnog koordinatora UN.
- (4) Privremena zajednička komisija omogućit će prisustvo sjednicama i predstavnicima organizacija civilnog društva iz člana 7. ovog poslovnika.
- (5) Privremena zajednička komisija će, nakon svake održane sjednice, informirati javnost o svom radu.

Član 9.
(Javni konkurs)

- (1) Privremena zajednička komisija donosi odluku o objavljivanju javnog konkursa radi provođenja procedure za imenovanje tri ombudsmena za ljudska prava.
- (2) Privremena zajednička komisija utvrđuje tekst javnog konkursa i izgled prijavnog obrasca.
- (3) U javnom konkursu bit će preciziran broj upražnjenih mjesta, zakonski uslovi da bi se kandidat smatrao kvalificiranim, rok za prijem prijave, postupak prijave na javni konkurs, te način i mjesto podnošenja dokumentacije uz prijavu, kao i ostale potrebne informacije.
- (4) Prilikom provođenja javnog konkursa i postupka utvrđivanja rang-liste kandidata Privremena zajednička komisija dužna je osigurati svim kandidatima jednake uslove

- za učešće na javnom konkursu, bez diskriminacije po bilo kojem osnovu (u skladu s članom 2. Zakona o zabrani diskriminacije, "Službeni glasnik BiH, broj 59/09);
- (5) Javni konkurs bit će objavljen u "Službenom glasniku BiH", „Službenom glasniku Brčko Distrikta BiH“ i na veb-stranici Parlamentarne skupštine BiH, te obavještenje o javnom konkursu u tri dnevna lista velikog tiraža u Bosni i Hercegovini, u oba entiteta;
 - (6) Javni konkurs sadržavat će napomenu da će podaci o kandidatima za ombudsmena za ljudska prava Bosne i Hercegovine biti objavljeni na veb-stranici Parlamentarne skupštine BiH, u skladu sa Zakonom o zaštiti ličnih podataka.
 - (7) Rok za podnošenje prijave na javni konkurs je najkasnije 15 dana od dana objavljivanja u „Službenom glasniku BiH“;
 - (8) U slučaju kada nakon isteka roka za prijavu broj primljenih prijava bude manji od broja upražnjenih mjesta, Privremena zajednička komisija će u sljedećem roku od 15 dana ponovo oglasiti upražnjena mjesta. U slučaju ponovnog oglašavanja, podnosilac prijave koji je već ranije priložio dokumentaciju nije obavezan ponovo se prijaviti na javni konkurs.

Član 10. **(Uslovi javnog konkursa)**

- (1) Kandidati iz člana 9. stav (1) ovog poslovnika moraju, u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine („Službeni glasnik BiH“, broj 37/03) i Zakonom o ombudsmenu za ljudska prava Bosne i Hercegovine („Službeni glasnik BiH“, br. 19/02, 35/04 i 32/06), ispunjavati opće i posebne uslove.
- (2) Opći uslovi su:
 - 1) da je stariji od 18 godina;
 - 2) da nije otpušten iz državne službe u institucijama Bosne i Hercegovine, odnosno entiteta kao rezultat disciplinske mjere u periodu od tri godine prije dana objavljivanja upražnjene pozicije u Službenom glasniku BiH;
 - 3) da se na njega ne odnosi član IX. 1. Ustava Bosne i Hercegovine.
- (3) Posebni uslovi su:
 - 1) da mu nije izrečena zatvorska kazna za krivično djelo kažnjivo u skladu s krivičnim zakonima u Bosni i Hercegovini, a koje ga čini nedostojnim za obavljanje funkcije ombudsmena za ljudska prava Bosne i Hercegovine;
 - 2) da protiv njega nije pokrenut krivični postupak;
 - 3) da je zdravstveno sposoban da adekvatno obavlja poslove za radno mjesto na koje se prijavljuje;
 - 4) za ombudsmena za ljudska prava mogu biti imenovani državljani Bosne i Hercegovine, diplomirani pravnici, s položenim pravosudnim ispitom i najmanje 10 godina radnog iskustva u pravnoj struci, u kojoj su se istakli, koji imaju dokazano iskustvo u oblasti zaštite ljudskih prava i sloboda građana, te visok moralni ugled;

- 5) ombudsmen za ljudska prava mora poštivati principe timskog rada, konsenzusa, tj. zajedničkog donošenja odluka i multietničkog pristupa u ostvarivanju nadležnosti i ugleda ombudsmena;
 - 6) ombudsmeni za ljudska prava imenuju se iz tri konstitutivna naroda (bošnjačkog, hrvatskog i srpskog), što ne isključuje mogućnost imenovanja i iz reda ostalih.
- (4) Ombudsmeni za ljudska prava imenuju se na mandat od šest godina i mogu biti ponovo izabrani.
- (5) Sukob interesa:
- 1) pozicija ombudsmena za ljudska prava nespojiva je s obavljanjem bilo kakve predstavničke dužnosti; s bilo kakvom političkom aktivnošću ili dužnošću ili odgovornošću za propagandu; nastavkom službe u organima vlasti u Bosni i Hercegovini, članstvom u političkoj stranci ili vođstvom političke stranke, sindikata, udruženja, fondacije ili vjerske organizacije ili radom u bilo kojoj od njih; s obavljanjem dužnosti sudije; kao i sa svakom aktivnošću kao zanimanjem ili profesijom, u privredi ili zapošljavanju;
 - 2) ombudsmen za ljudska prava koji je bio službenik uživa garanciju ponovnog prijema u prijašnju službu nakon isteka njegovog mandata;
 - 3) ombudsmen za ljudska prava će, u roku od 10 dana po njegovom imenovanju, i prije preuzimanja svoje službe, napustiti svaku poziciju koja je potencijalno nespojiva, a ukoliko propusti da to uradi, smatrat će se da je odbio imenovanje;
 - 4) kada dođe do nespojivosti nakon što je ombudsmen za ljudska prava preuzeo dužnost, podrazumijeva se da će on napustiti dužnost ombudsmena za ljudska prava na dan pojave nespojivosti.

Član 11.

(Dokumenti koji se prilažu uz prijavu)

- (1) Uz prijavu na javni konkurs, kandidat je dužan priložiti:
- 1) popunjen prijavni obrazac (obrazac, čiji sadržaj utvrđuje Privremena zajednička komisija, bit će dostupan na veb-stranici: www.parlament.ba);
 - 2) biografiju (CV);
 - 3) ovjerenu kopiju tražene fakultetske diplome osnovnog studija pravnog fakulteta (nostrificirane diplome, ako fakultet nije završen u Bosni i Hercegovini ili je diploma stečena nakon 6.4.1992. u nekoj od država nastalih na teritoriji bivše SFRJ);
 - 4) ovjerenu kopiju uvjerenja o položenom pravosudnom ispitu;
 - 5) uvjerenje o državljanstvu Bosne i Hercegovine ne starije od šest mjeseci;
 - 6) dokaz o traženom radnom iskustvu u pravnoj struci, izdat od relevantne institucije;
 - 7) dokaz da protiv njega nije pokrenut krivični postupak, izdat od nadležnog suda (ne stariji od tri mjeseca);
 - 8) ljekarsko uvjerenje.
- (2) Dokumenti se dostavljaju u originalu ili kao ovjerene kopije.

- (3) Dokaze o ispunjavanju uslova iz stava (1) tač. 7) i 8) ovog člana dužni su dostaviti samo kandidati koji budu imenovani za ombudsmene za ljudska prava.

Član 12.
(Provjera valjanosti i potpunosti prijave)

- (1) Privremena zajednička komisija razmotrit će sve pristigle prijave i provjeriti da li su kandidati, u skladu sa uslovima javnog konkursa, dostavili valjane dokaze o ispunjavanju općih i posebnih uslova.
- (2) Privremena zajednička komisija odbacit će prijave kojima nedostaju dokazi o ispunjavanju uslova iz javnog konkursa (nepotpune) i prijave s dokazima koji nisu valjani (neuredne). Neblagovremene prijave Privremena zajednička komisija neće razmatrati.
- (3) Nakon što obavi provjeru u skladu sa stavom (1) ovog člana, Privremena zajednička komisija će, radi vođenja tačne evidencije, sačiniti listu prijavljenih kandidata čije su prijave odbijene, te će o toj činjenici svojim aktom obavijestiti kandidate.
- (4) Nakon što obavi provjeru u skladu sa stavom (1) ovog člana, Privremena zajednička komisija sačinīt će listu prijavljenih kandidata čije su prijave prihvaćene i koji će biti pozvani na intervju.
- (5) Lista prijavljenih kandidata, čije su prijave prihvaćene i koji će biti pozvani na intervju, bit će s biografijama objavljena na veb-stranici Parlamentarne skupštine BiH.

Član 13.
(Intervju)

- (1) Privremena zajednička komisija će kandidatima iz člana 12. stav (4) uputiti poziv za intervju. Kandidati će biti obaviješteni o datumu, vremenu i mjestu održavanja intervjuja.
- (2) Intervju je razgovor članova Privremene zajedničke komisije s kandidatima čije su prijave prihvaćene. Cilj intervjuja je utvrditi stručnost i osposobljenost kandidata za obavljanje traženih zadataka, te krajnju i ukupnu ocjenu kandidata.
- (3) Prije intervjuja izvršit će se identifikacija kandidata, uvidom u identifikacioni dokument s fotografijom.
- (4) Kandidat je obavezan otkriti bilo koju činjenicu koja bi mogla dovesti do sukoba interesa u slučaju njegovog imenovanja.
- (5) Intervju s jednim kandidatom može trajati do 60 minuta, tako da svaki član Privremene zajedničke komisije ima na raspolaganju do 10 minuta za postavljanje pitanja i odgovor kandidata. Članovi Privremene zajedničke komisije će prilikom postavljanja pitanja uzeti u obzir i pitanja koja su predstavnici organizacija civilnog društva, u pisanoj formi, do dana održavanja intervjuja, dostavili Privremenoj zajedničkoj komisiji.

- (6) Pitanja na intervjuu mogu se odnositi na: provjeru odnosno pojašnjenje podataka iz biografije, pojašnjenje u vezi sa ispunjavanjem uslova javnog konkursa, posebnim stručnim zvanjima, vještinama i ostvarenim rezultatima, priznanjima i iskustvima iz oblasti u vezi s mjestom za koje je konkurs raspisan. Pitanja mogu biti vezana za sukob interesa kandidata, opća znanja koja ne moraju biti u direktnoj vezi s mjestom za koje je raspisan konkurs, ali mogu pomoći članovima Privremene zajedničke komisije u rangiranju kandidata za to mjesto. Mogu biti postavljena i bilo kakva druga pitanja, ali samo pod uslovima da nisu usmjerena protiv ličnog integriteta kandidata.
- (7) U slučaju kada na intervju bude pozvan veći broj kandidata, intervju se može planirati i održavati više dana, cijeneći potrebno vrijeme za svakog kandidata. Kandidati će pristupati intervjuu utvrđenim abecednim redom.

Član 14. (Ocjenjivanje kandidata)

- (1) Svaki član Privremene zajedničke komisije na intervjuu ocjenjuje svakog kandidata za ukupan utisak koji je kandidat na njega ostavio.
- (2) Privremena zajednička komisija utvrđuje tipski obrazac za ocjenjivanje koji popunjavaju njeni članovi nakon obavljenog intervjuu.
- (3) Privremena zajednička komisija ocjenjivat će kandidate na osnovu sljedećih kriterija:
- 1) obavljenog intervjuu (od 0 do 30 bodova),
 - 2) dosadašnjeg radnog iskustva u pravnoj struci (od 0 do 30 bodova),
 - 3) stečenog iskustva u oblasti zaštite ljudskih prava i sloboda građana (od 0 do 30 bodova).
- (4) Članovi Privremene zajedničke komisije će prilikom ocjenjivanja kandidata uzimati u obzir odredbu Zakona o ombudsmenu za ljudska prava Bosne i Hercegovine kojom se traži da ombudsmeni za ljudska prava imaju visok moralni ugled.
- (5) Privremena zajednička komisija vodi zapisnik u kojem jasno navodi broj bodova koje je dobio svaki kandidat.
- (6) Ukupna ocjena svakog kandidata je zbir bodova koje je dobio od svakog člana privremene zajedničke komisije, u skladu s kriterijima iz stava (3) ovog člana.
- (7) Privremena zajednička komisija dužna je osigurati mehanizme tajnosti bodovanja i, osim krajnje ocjene, javnosti neće otkriti dokumente o bodovanju.
- (8) Privremena zajednička komisija može također sačiniti i druge vrste obrazaca koje kandidati treba da popune.

Član 15. (Sačinjavanje prijedloga rang-liste)

- (1) Nakon bodovanja kandidata i dobivenih ocjena za sve kandidate koji su pristupili intervjuu, u skladu s članom 14. ovog poslovnika, Privremena zajednička komisija

utvrdit će rang-listu prema broju dobivenih bodova kandidata za ombudsmena za ljudska prava. Uz ime svakog kandidata bit će naveden broj dobivenih bodova.

- (2) Rang-listu iz stava (1) ovog člana Privremena zajednička komisija dostavit će Predstavničkom domu i Domu naroda Parlamentarne skupštine Bosne i Hercegovine na daljnji postupak.
- (3) Uz rang-listu iz stava (1) ovog člana Privremena zajednička komisija će za svakog kandidata dostaviti biografiju.
- (4) Privremena zajednička komisija će rang-listu iz stava (1) ovog člana objaviti na veb-stranici Parlamentarne skupštine BiH.

Član 16. (Zapisnik)

- (1) O toku sjednice Privremene zajedničke komisije vodi se zapisnik.
- (2) Zapisnik vodi sekretar Privremene zajedničke komisije.
- (3) Usvojeni zapisnik potpisuju predsjedavajući i sekretar Privremene zajedničke komisije. Usvojeni zapisnik objavljuje se na veb-stranici Parlamentarne skupštine BiH.

Član 17. (Izmjene i dopune)

Izmjene i dopune ovog poslovnika provode se na način i prema postupku za njegovo usvajanje.

Član 18. (Zaključak Privremene zajedničke komisije)

U slučaju specifičnih pitanja koja nisu uređena ovim poslovníkom, Privremena zajednička komisija će ta pitanja urediti zaključkom.

Član 19. (Stupanje na snagu)

Ovaj poslovnik stupa na snagu danom usvajanja.

Predsjedavajući
Privremene zajedničke komisije

Halid Genjao

